

МЕСЯЦА АПРЕЛЯ В 23-Й ДЕНЬ

СВЯТАГО СЛАВНАГО ВЕЛИКОМУЧЕНИКА, И ПОБЕДОНОСЦА, И ЧУДОТВОРЦА ГЕОРГИЯ

Аще храм, или восхоцет настоятель, творим бдение.

НА МАЛОЙ ВЕЧЕРНИ

На Господи, возвах: стихиры на 4, глас 1.

Подобен: Небесных чинов:

Истины весна светло наста * и обновляет тварь * благочестивым познанием Христа Жизнодавца, * темже, ясно просвещен в разуме, * страдалец Господень * вражие попрра ухищрение.

Царю веков ты воинствовав, премудре, * ополчения вся беззаконных низложил еси, * Георгие треблаженне, * твердый страдалец показался еси * благодатию, от Бога тебе данною, чудотворче, * темже моли спастися нам.

Струи исцелений подаеши * к тебе притекающим, Георгие треблаженне, * и душ и телес помощник ты еси, * верою теплою приходящих к покрову твоему, * досточудне мучениче Иисусов, * страдальцев украшение.

Слава, глас тойже. Самогласен:

Великаго Царя воине Георгие, * радуйся и веселися, * Богу бо благоугодил еси, * о всех нерадив, живот вечный приял еси на Небесех, * тело бо твое всяк недуг от человек отгонит. * Христос бо, Егоже возлюбил еси, * Той тя прославляет, блаженне.

И ныне, праздника.

На стиховне стихиры, глас 4. Самогласны:

Вси языцы, восплещите руками, * воскликните Богу, мучениколюбцы, * яко на Древо вознесся и, во гроб сошед, * ада испроверже, и мертвыя совоскреси, вопиюция Ему: * аллилуия, аллилуия, аллилуия Христу воскресшему.

Стих: Праведник, яко финикс, процветет, * яко кедр, иже в Ливане, умножится.

Пение песней, ликовствующе купно, * принесем Христу Спасу нашему, * яко томителя врага доблий страдалец, победив, низложи. * Тем вси поем непрестанными гласы: * аллилуия, аллилуия, аллилуия Христу воскресшему.

Стих: Насаждени в дому Господни, * во дворех Бога нашего процветут.

Красота мученик и слава праведных * явился еси, венценосче Георгие, * мужеством бо смысла и мудростию души * вражие безумие поправ на земли, с нами вопиеши: * аллилуия, аллилуия, аллилуия Христу Жизнодавцу.

Слава, глас той же:

Приидите, мучениколюбцы, * песненное пение воставшему из гроба Христу принесем: * днесь бо весна разумная возсия нам, * подаюци цветы словесныя, * всемирная память Георгия, * мудраго великомученика. * Егоже достойно почитающе, * приемлем исцелений источники, * с нимиже и ныне того умолим * молиться непрестанно Спасу Христу * мир вселенней даровати * и душам нашим велию милость.

И ныне, праздника.

Тропарь зри на велицей вечерни.

НА ВЕЛИЦЕЙ ВЕЧЕРНИ

Блажен муж: на Господи, воззвах: поставим стихов 8.

Стихиры праздника 3 и святого 5. Глас 4. Самоподобен:

Яко добля в мученицех, * страсотерпче Георгие, * сошедшея днесь, восхвалим тя, * яко течение совершив, * веру соблюл еси * и прият от Бога победы твоя венец. * Егоже моли от тли и бед избавитися * верою совершающим * всечестную память твою.

Подобны:

Твердым мудрованием уповав, * самохотне дерзнул еси, * якоже лев, славне, к страданию, * презирая убо тело, * яко растлетися хотящее, * о нетленной же души мудре прилежал еси * и мук многообразными виды разжегся еси, * яко золото очищено * седмерицею, Георгие.

За Спаса пострадал еси * и, смертию смерти вольне, славне, подобяся, * царствуещи с Ним светло, * порфирию от крове одеян светлою, * и скиптром страданий твоих украшен, * и венцем победы лепотствуя * в непроходимыя веки, * великомучениче Георгие.

Веры бронями, * и щитом благодати, * и Креста копием вооружився, * сопротивным непобедим был еси, Георгие, * и, яко Божественный храборник, * демонская ополчения победив, * со Ангелы ликуещи, * верныя же заступаещи, и освящаещи, * и спасаещи, призываемый.

Яко звезду многосветлую, * якоже солнце, сияющее * на тверди Небесней, ты вемы, * и яко бисер многоценный, * яко камень блистающий, * яко сына ты дне, * яко доблественнаго в мученицех, * яко поборника верных в бедах прославляем, * совершающе твою память, победоносче Георгие.

Слава, глас 6:

Достойно имени пожил еси, * воине Георгие: * Крест бо Христов на рамо взем, * от диавольския лести оляденевшую землю добре делал еси * и, терновное служение искоренив идольское, * православныя веры лозу насадил еси. * Темже точиши исцеления во всей вселенней верным * и Троицы делатель праведен показался еси. * Моли, молимся, о умирении мира * и спасении душ наших.

И ныне, праздника.

Вход. Прокимен дне, и паремии.

Пророчества Исаина чтение (глава 43):

Тако глаголет Господь: вси языцы собрашася вкупе, и соберутся князи от них. Кто возвестит сия в них? Или яже от начала, кто слышана сотворит вам? Да приведут свидетели своя, и оправдаются, и да услышат, и да рекут истину. Будите Ми свидетели, и Аз свидетель, глаголет Господь Бог, и отрок, егоже избрах, да познаете, и веруете Ми, и разумеете, яко Аз есмь, прежде Мене не бысть ин бог и по Мне не будет. Аз есмь Бог, и несть, разве Мене, спасаяй. Аз возвестих и спасох, уничижих и не бе в вас чуждый. Вы Мне свидетели, и Аз Господь Бог, и еще от начала Аз есмь, и несть, от рук Моих избавляяй. Сотворю, и кто отвратит то? Сице глаголет Господь Бог, избавляяй вас Святыи Израилев.

Премудрости Соломони чтение (глава 3):

Праведных души в руке Божией, и не прикоснется их мука. Непщевани быша во очесех безумных умрети, и вменися озлобление исход их. И еже от нас шествие – сокрушение, они же суть в мире. Ибо пред лицом человеческим аще и муку примут, упование их безсмертия исполнено. И в мале наказани бывше, великими благодетельствовани будут, яко Бог искуси я и обрете их достойны Себе. Яко злато в горниле, искуси их и яко всеплодие жертвенное, прият я. И во время посещения их возсияют и, яко искры, по стеблию потекут. Судят языком и обладают людьми, и воцарится Господь в них во веки. Надеющиеся Нань разумеют истину и вернии в любви пребудут Ему, яко благодать и милость в преподобных Его и посещение во избранных Его.

Премудрости Соломони чтение (глава 4):

Праведник аще постигнет скончатися, в покои будет. Старость бо честна не многолетна, ниже в числе лет исчитается. Седина же есть мудрость человеком, и возраст старости житие нескверное. Благоугоден Богу быв, возлюблен бысть и живой посреде грешник, преставлен бысть. Восхищен бысть, да не злоба изменит разума его, или леть прельстит душу его. Рачение бо злобы помрачает добрая и парение похоти пременяет ум незлобив. Скончався в мале, исполни лета долга, угодна бо бе Господеву душа его, сего ради потщася от среды лукавствия. Людие же, видевше и не разумеюще, ниже положше в помышлении таковое, яко благодать и милость в преподобных Его и посещение во избранных Его.

На литии стихира храма и святого самогласны.

Глас 1. Анатолиево:

Светлый храборник Георгий * в славнем страдании своем Горния силы веселит, * и с ними радуяся ныне, * и на земли верныя торжествовати воздвиже * и спраздновати нам, того ради собранным, * яко Христов раб прииде. * Темже убо его достойно почтим, * непрестанно молящася всех Богу * даровати нам велию милость.

Доблественными страданием возделав лучшая, * труды плодов твоих Христу принесл еси, * преблаженне мучениче Георгие, * верою желание утвердив, * надеждою страх отринув, * любовь стяжал еси небесную, прехвальне. * Дерзновение имея убо, благоприятными мольбами * проси душам нашим мира, * очищения же грехов и велия милости.

Глас 4:

Приидите, верных собори, * приидите, праздник составим, * ибо пресветлая память днесь явися * страсотерпца Георгия, * наша просвещает невидимо сердца, * добродетельми блистающе. * Темже, единомудренно воспевающе, рцем: * радуйся, воине великаго Царя Христа; * радуйся, пресветлая похвало веры; * радуйся, всесветле и пребогате. * О нас, преблаженне, * всех Владыку Христа Бога моли * сохраненным быти от искушений лукаваго * и спасти души наша.

Слава, глас 5. Феофаново:

Возсия весна, приидите, насладимся, * просия Воскресение Христово, * приидите, возвеселимся, * страсотерпца память, верныя просвещающе, показася. * Темже, празднолюбцы, приидите, * тайно ту торжествуем: * сей бо, яко добр воин, * мужествовав на мучителей, и сих посрами, * подобник быв страсти Спаса Христа, * не помилова сосуда своего брэннаго, * но нага обостри, муками того изменяя. * Тому возопием: * страстоносче, моли спастися душам нашим.

И ныне, праздника.

На стиховне стихиры, глас 4.

Подобен: Званный свыше:

Восхваляют людие псалмы, * вкупе и песньми * твою славную память, Георгие, * яко благолепна бо возсия и светоносна, * украшена славою и благодатию. * Темже играют ныне Ангельстии чини, * хвалят же мученицы со апостолы * твоих подвигов, мучениче, страдания * и воспевают прославльшаго тя * Спаса, Христа Бога нашего. * Егоже моли спасти и просветити души наша.

Стих: Праведник, яко финикс, процветет, * яко кедр, иже в Ливане, умножится.

Облечен во Христово всеоружие, * обрелся еси, Георгие, не ищущим тебе, * ты бо, за Христа огнем распалаемь * и ругаяся богов суетных безбожному сверепству, * тогда: воинствую Царю моему Христу, – * беззаконным зывал еси, – * ни зверие, ни колеса же, ни ина мука * мене разлучити возмогут когда * любви Христа моего. * Егоже моли * спасти и просветити души наша.

Стих: Насаждени в дому Господни, * во дворех Бога нашего процветут.

Небрег о сосудех многообразных, * и о различных муках, * и о оружиях страшных, * венценосче Георгие, * благочестия мученически течение скончал еси. * Темже пресветлую память твою * цветы песенными венчаем * и честныя твоя обლობызаем верою мощи. * Но, яко престолу предстоя Владыки, * Христа Бога нашего, * молити не престай * спасти и просветити души наша.

Слава, глас тойже. Самогласен. Студитово:

Разумнаго адаманта терпение, * братие, духовно восхвалим, * Георгия, славнаго мученика, * егоже, за Христа разжигается, * коваху беды, и изостриша муки, * и различная мучения изнуриша тело, естеством тленно, * побеждаше бо желание естество, * смертию понуждая рачителя * прейти к желаемому Христу Богу * и Спасу душ наших.

И ныне, праздника.

На благословении хлебов тропарь дважды, глас 4:

Яко пленных свободитель * и нищих защититель, * немощствующих врач, * православных поборниче, * победоносче, великомучениче Георгие, * моли Христа Бога * спастися душам нашим.

Ин тропарь, глас 4:

Подвигом добрым подвизался еси, * страсготерпче Христов, * верою и мучителей обличил еси нечестие, * жертва же благоприятна Богу принесся еси. * Темже и венец приял еси победы * и молитвами, святе, твоими всем подаеши * прегрешений прощение.

И Богородице Дево: единожды. И прочая.

НА УТРЕНИ

На Бог Господь: тропарь праздника, дважды.

Слава, святого. глас 4:

Яко пленных свободитель * и нищих защититель, * немощствующих врач, * православных поборниче, * победоносче, великомучениче Георгие, * моли Христа Бога * спастися душам нашим.

И ныне, праздника.

По 1-й стихологии седален праздника.

Слава, и ныне, тойже.

По 2-й стихологии седален, глас 1.

Подобен: Гроб Твой:

Се возсия благодати весна, облиста Христово Воскресение всем, * и с ним совозсиявает ныне Георгия мученика всепразднственный и светоносный день, * приидите вси, свещи носяще божественне, светло празднуем.

Слава, глас тойже.

Подобен: Лик Ангельский:

Воинство, еже на земли, возненавидев, мучениче, * на Небесех возжелал еси славы, * и болезни претерпел еси, и нуждную смерть. * Темже днесь всесвятую твою память празднуем, * Христу приносяще хвалу, преблаженне Георгие.

И ныне, праздника, или Богородичен:

Матерь Тя Божию молим вси, * Деву воистинну и по рождестве явльшуся, * любовию прибегающей к Твоей благодати: * Тебе бо имамы, грешнии, Предстательницу, * Тебе стяжахом в напастех спасение, едину Всенепорочную.

По полиелеи седален, глас 3.

Подобен: Божественныя веры:

Любовию горящею Владычнею разжизаемь, * мужемудренне прелести сокровища низложил еси * и, на судищи Христа исповедав, * победоносче всеблаженне Георгие, мучениче преславне, * Христа Бога моли даровати нам велию милость.

Слава, глас 4.

Подобен: Удивися:

Возделав прилежно семя Божественных заповедей, * расточил еси нищим все богатство благочестно, * вместо сих стяжав, преславне, Христову славу. * Темже надеяся, к подвигом идеши * и болезнем долгим, мучениче Георгие, * и общник быв страсти Безстрастного и Воскресения, * Царствия Того причащаяся, о нас ныне молися.

И ныне, праздника, или Богородичен:

Слово Отчее, Христа Бога нашего, * от Тебе воплотившагося, познахом, Богородице Дево, * едина Чистая, едина Благословенная, * тем непрестанно Тя воспевающе, величаем.

Степенна, 1-й антифон, 4-го гласа.

Прокимен, глас 4: Праведник, яко финикс процветет, * яко кедр, иже в Ливане, умножится.

Стих: Насаждени в дому Господни, во дворех Бога нашего процветут.

Всякое дыхание:

Стих: Хвалите Бога во святых Его:

Евангелие от Луки, зачало 63.

Рече Господь: ничтоже покровено есть, еже не открыется, и тайно, еже не уразумеется. Зане, елика во тме ресте, во свете услышатся, и еже ко уху глаголасте во храмах, проповестся на кровех. Глаголю же вам другом Своим: не убойтесь от убивающих тело и потом не могущих лишше что сотворити. Сказую же вам, кого убойтесь, убойтесь имущаго власть по убиении вовек в дебрь огненную, ей, глаголю вам, того убойтесь. Не пять ли птиц ценится пенязема двема? И ни едина от них несть забвена пред Богом. Но и власи главы вашае вси изочтени суть. Не убойтесь убо, мнозех птиц унши есте вы. Глаголю же вам: всяк, иже аще исповест Мя пред человеки, и Сын Человеческий исповест его пред Ангелы Божиими, а отвергийся Мене пред человеки отвержен будет пред Ангелы Божиими. И всяк иже речет слово на Сына Человеческаго, оставится ему, а на Святаго Духа хулившему не оставится. Егда же приведут вы на соборища и власти и владычества, не пецйтесь, како или что отвещаете, или что речете, Святыи бо Дух научит вы в той час, яже подобает рещи.

По 50-м псалме стихира самогласна, глас 6:

Днесь вселенная вся страстотерпца просвещает зарями, * и Христова Церковь, цветы украшаема, * Георгие, вопиет ти: * угодниче Христов и заступниче теплый, * не престай моляся о рабех твоих.

Канон праздника на 6 и святого два на 8.

Святого канон, творение кир Феофана. Глас 2.

Песнь 1

Ирмос: Во глубине постла иногда * фараонитское всевоинство преоруженная сила, * воплощенное же Слово всезлобный грех потребило есть, * препрославленный Господь, славно бо прославился.

Теплою верою и любовию призывающая тя, мучениче Христов, венценосче Георгие, предстоя всесветел честному престолу всеми Владущаго, твоими молитвами и предстательствами сохрани.

Благородно возделание Христу был еси, Георгие, мученическими возделан деянии, и, яко богатство преславно, в Небесных тя сокровищах положи Подвигоположник, яко преизящне храбрствовавшего.

Твердо и терпеливо устремился еси, самозван, к подвигом, преблаженне Георгие, и, низложив свирепое мучителей ополчение, молитвенник о всех, призывающих тя, был еси.

Блаженную, славне, жизнь ныне восприем, во Христе сокровенную, Георгие, о нейже подвизался еси до крове, верою поющим тя моли спастися от всякаго, страстотерпче, обстояния.

Богородичен: Небо была еси словесное, Слово Небесное в Твоей утробе, Богомати, вмещшая, Имже вся быша: Небо же, и земля, и яже вышше сих. Темже со дерзновением моли спасти поющая Тя.

Другий канон, творение кир Космы. Глас 4.

Песнь 1

Ирмос: Лицы израильтестии, * невлажными стопами * понт Чермный и влажную глубину прогнавше, * всадники тристаты, враги, видяще в ней погружены, * с веселием пояху: * поим Богу нашему, яко прославися.

Страданий священных скончал еси течение, и, к Небеси идый, нетленен венценосец показался еси, благоцветущ, Георгие, явлься путник, и со Ангелы ликуеши: поим Богу нашему, яко прославися.

Потом благих еще боля, премирным явился еси ликом, искапая, Безплотных чины плотскими, Георгие, удивил еси Божественными страданиями. С сими ликуя, зовещи: поим Богу нашему, яко прославися.

Богородичен: Жезл Ааронов прозябший, иже от Иессея проображаше израстший корень, Тя, Пречистую, цвет миру возсиявшую, Бога воплощенна, Егоже о нас молящи не престай, Приснодево, прибегающих к Тебе.

Катавасия: Воскресения день:

Песнь 3

Ирмос: Процвела есть пустыня, яко крин, Господи, * языческая неплодящая Церковь, * пришествием Твоим, * в нейже утвердися мое сердце.

Венцем страдания сияя, славне, благочестно призывающия тя моли Избавителя и Бога от всякия нужды, блаженне, избавити.

Богатыми просвещаемь сиянии, премудре, мрачную отжени печаль и мглу страстей от нас, верою восхваляющих тя.

Надеждею утверждаемь и любовию, верою же ограждься, Георгие, и силою укреплься Христовою, идольскую прелесть низвергл еси.

Богородичен: Просвещшаго концы, Пречистая, родила еси с плотию Безплотнаго и прежде всех Отцу Собезначальна, темже Тя, Богородицу, вернии, чтим.

Ин

Ирмос: Яко неплоды, роди от язык Церковь, * и многое в чадех изнеможе сонмище, * чудному Богу нашему возопиим: * Свят еси, Господи.

Тихо раздал еси нищим богатство и, умадився елеем любви, телом и душою страдальчески, Георгие, мучителя вкупе победил еси.

Утвердився благодатию и огнем распалаемь ревности, не вопрошающим явился еси, обрелся еси не ищущим, по Христе, Георгие, гневаяся на лесь идольскую.

Богородичен: Яко носиши на руку, Марие, и от сосцу питаеши питающаго всякое дыхание, Егоже, Богородице, чтуще, проповедаем. Молися Ему, Чистая, о всех нас.

Катавасия: Приидите, пиво пием новое:

Кондак праздника и икос.

Седален, глас 8.

Подобен: Премудрости:

Благочестия образы мужески храбрствуя, * нечестия прелесть низложив, мучениче, попрали еси врага шатания * и, Божественным желанием присно разгараемь, * мучителей угасил еси безбожное сверепство. * Темже достойно возмездие мук приял еси венец * и подаеши исцеления верою притекающим. * Стратотерпче Георгие, моли Христа Бога согрешений оставление даровати * празднующим любовию святую память твою.

Слава: Земное богатство на земли раздаваяй всем, мучениче мудре, * богатство Небесное наследовал еси труды твоими, * Крестом бо честным, яко в броню, оболкся * и тем посрамил еси мучителей шатание. * Темже молитвами просящим тя подаеши Божественная дарования, * исцелений благодаяния. * Страстоносче Георгие, молися Христу Богу, * прегрешений оставление даровати * празднующим любовию святую память твою.

И ныне, праздника.

Песнь 4

Ирмос: Пришел еси от Девы * не ходатай, ни Ангел, но Сам, Господи, воплощься, * и спасл еси всего мя, человека. * Тем зову Ти: слава силе Твоей, Господи.

Поем твоя подвиги, преблаженне Георгие, имиже разсыпал еси идольския службы, всю же упразднил еси демонскую прелесть, преславне.

Утиши напастей и бед смущение и всякое наветие злое демонов отжени от поющих тя, Христова воина, досточудне.

Возсиял еси, яко звезда светоносная, Георгие, душевною доблестию и твердостию веры прелесть мрачную отгоня и спасая поющих тя.

Богородичен: Спасение существенное, Дево, родила еси, богатством благодати и естественною благодатью спасающее человека и истлевший образ назидующее.

Ин

Ирмос: Услышав Твое, Христе, воистинну преславное: * яко Безсмертен сый Бог * уподобился смертным человеком и пребысть, еже бе, * и того ради Твою славлю силу.

Ужас пред судища мучителей извествоваше неразумна сказания словес твоя мудрости, Георгие, Христос же неведущим Бог познавашеся.

Словом веры Христовы, Георгие премудре, мудрецем сплетения разрешил еси басней скверных, страстей же боги делатели поругал еси, Троице поборниче.

Услышавше, слухом словес твоих мучителие посрамишася, ты бо, богом их ругаяся, смех показовал еси, Христа Бога проповедуя, плотию распята, и упразднивши прелесть душегубную.

Богородичен: Тебе, Приснодевою и воистинну едину Богородицу, славим, Юже прообразоваше Боговидцу Моисею неопально, Пречистая, купина, огню примесившаяся.

Катавасия: На Божественней стражи:

Песнь 5

Ирмос: Просвещение во тьме лежащих, * спасение отчаянных, Христе, Спасе мой, * к Тебе утреннюю, Царю мира, * просвети мя сиянием Твоим: * иного бо, разве Тебе, бога не знаю.

Мученическое дерзновение яко имея ко Владыце, проси усердно спасения ты поющим, душевных недуг изменяя твоими мольбами, мучениче страстотерпче, преблаженне Георгие.

Со Ангельскими ликуя, яко мученик, ликостоянии и бессмертныя и блаженныя, венченосче, насыщаяся славы, покрову твоему прибегающии всякаго треволнения и бури исхити.

Избави нас от всякия нужды, яко Милостив, греховное и бедное отгоня многообразное смущение, Георгия Твоего угодника молитвы, Христе, приемля.

Богородичен: Долг праматере Евы, Богомати, отдала еси, плотию бо обложила еси из Тебе рожденна Спаса мира. Темже Тя вси блажим, обрадованная Дево Всенепорочная.

Ин

Ирмос: Просвещение Твое, Господи, низпосли нам * и от мглы прегрешений разреши ны, Блаже, * Твой мир даруяй.

Страдальчески, Георгие, сплетаяся, винам различныя прелести мужески противяся, мира же наг, державу отъял еси лютаго миродержца.

Оградився, Георгие, оружием Креста, надеждою веры, любовию державною притушил еси остроту и все оружие лютаго борца.

Богородичен: Мучителей разум девственное посрами чрево: Младенец бо язву аспидную душегубную испыта рукою и, отступника гордаго низложив, верным под нозе покори.

Катавасия: Утренюем утреннюю глубокоу:

Песнь 6

Ирмос: В бездне греховней валяясь, * неизследную милосердия Твоего призываю бездну: * от тли, Боже, мя возведи.

Паче естества, и слова, и помысла доблести твоя храбрствования, непрестанно певаема, преблаженне мучениче Георгие.

Воинству Небесному собеседник, блаженне, быв и Божественное явление елико достижно зря, ты верою чтущия спасай.

Всеми образы Богу возложен и блистания чудес приемля, дарования требующим раздаваеши, преблаженне Георгие.

Богородичен: Ныне к Тебе прибегаю, Пречистая, спаси мя молитвами Твоими и соблюди: елико бо хоцещи, можещи, яко Мати Всемогущаго.

Ин

Ирмос: Возопи, прообразуя погребение тридневное, * пророк Иона, в ките моляся: * от тли избави мя, Иисусе, Царю сил.

Возопил еси со дерзновением к Зиждителю, Георгие: не предаждь незаконным раба Твоего, но крепость ми подаждь разорити их шатание.

Небрег о мучительных сосудах, Георгие, на подвиги волею мужески притекл еси и почестными победами от Христа Бога венчался еси.

По искушении добродетели твоя, к чудеси, Георгие, преложше прещение, лбствивнии мучители, Егоже проповедал еси, Животодавца Христа, удивишася.

Богородичен: Древле убо прелести мя змий и умори мя праматерию мою Евою; ныне же, Чистая, Тобою Создавый мя из исления воззва.

Катавасия: **Снизшел еси в преисподняя:**

Кондак, глас 4.

Подобен: Вознесыйся:

Возделан от Бога, показался еси благочестия делатель честнейший, * добродетелей рукояти собрав себе: * сеяв бо в слезах, веселием жнеши, * страдальчествовав же кровию, Христа приял еси * и молитвами, святе, твоими всем подаеши прегрешений прощение.

Икос: **За** мирский живот душу свою положившаго, * Христа Царя желая, воин тщится умерети за Него, * ревность же велию Божественную в сердца имея, * себе самого приведе. * Того убо и мы вси, Божественнаго Георгия, * яко тепла предстателя воспоим верою, * яко славнаго суща Христова раба, подобящася яве своему Владыце * и всякому молящуся приходяща: * спешит бо присно и молит Спаса * всем подати согрешений прощение.

Песнь 7

Ирмос: **Богпротивное веление * беззаконнующаго мучителя высок пламень вознесло есть, * Христос же простре Богочестивым отроком росу духовную, * Сый благословен и препрославлен.**

Твоему подобяся, мучениче, Владыце, волею потекл еси к подвигом, славне, и, победу взем, Церкви Христовы хранитель был еси: Сию присно сохраняя предстательством твоим.

Яко мученик непобедим яко страдалец, яко неодоленный веры поборник, ныне столп непоколебим восхваляющим тя, премудре Георгие, буди, ограждая молитвами твоими.

Мудре земледелав Божественное семя, и сие умножил еси, кровей твоих теченьми напоив, блаженне, и болезней тцанием, и различными ранами, имиже сверепство мучителей угасил еси.

Богородичен: Дева пребыла еси и по рождестве, Бога бо родила еси, питающаго всяческая, за неизреченную милость и милосердие многое Человека бывшаго, Чистая, Егоже ныне моли спастися всем нам.

Ин

Ирмос: **Авраамстии иногда в Вавилоне отроцы * пещный пламень попраша, песньми взывающе: * отец наших Боже, благословен еси.**

Одержашую видя идольскую леств, благочестия распалаемь ревностию, Георгие, к подвигом тебе отдал еси, преблаженне, вопия: отец наших Боже, благословен еси.

Проповедуя явился еси гонимую веру, мглу же прелести обличая, Георгие, глагола еси: отец наших Боже, благословен еси.

Из корене посекал еси прелесть и возделал еси веру, благочестием большую, Георгие, радовался еси, глаголя: отец наших Боже, благословен еси.

Богородичен: Превышши тварей всех еси, яко Творца рождши и Господа. Темже Ти вопию, Богородице: Благословенная, Господь сил с Тобою.

Катавасия: Отроки от печи избавивый:

Песнь 8

Ирмос: Пещь иногда огненная в Вавилоне действия разделяше, * Божиим велением халдеи опаляющая, * верныя же орошающая, поющая: * благословите, вся дела Господня, Господа.

Поток лютых страстей же и бед, и мятежнаго обстояния, и болезней падения, и демонов козни, и злочестивых стремления укроти твоими молитвами, венценосче Георгие.

Весь светом, блаженне, Тройческим чисто облистаеть, яко мученик непобедим, яко благочестия поборник, яко победитель Боговенчанен, спаси, Небесный жителю, тя чтущия молитвами твоими.

Венцем разумным различно украшен, и Царствия диадимою, и скиптром удобрен, и багряницею обложен, твоею обогрен кровию, блаженне, сцарствуеша Царю сил.

Богородичен: От Отца, безлетно Рожденнаго и прежде век возсиявша, всяческая сотворшаго, видимая же и невидимая, Дево Мати, родила еси. Темже Тя, Богородицу, вси языцы, славим.

Ин

Ирмос: Радующеся по осуждении мучительском отроцы, * яко да не богом скверным послужат всем, но живому Богу, * на огонь дерзнуша, * от Ангела же орошаеми, песнь пояху: * дела Господня, Господа пойте и превозносите во вся веки.

Духом укрепляемь, о оружных болезнях небрегл еси, яко не глухим идолом хвалу посылаеша, но Христу Богу, к Немуже любезну стяжав, Георгие, веру, глагола еси: дела Господня, Господа пойте и превозносите во вся веки.

Яко не сущу временную нещю красоту, различная озлобления подъял еси, Георгие, радуяся надеждо Божественныя жизни, о страшнем же раздроблении небрег, твердостью души глагола еси: дела Господня, Господа пойте и превозносите во вся веки.

Разсекаемо медными сосуды твое тело, острыми ножи по единому уду раздробляемо видя, вжиляемь душею: будущей славе недостойны нынешния муки, глагола еси: дела Господня, Господа пойте и превозносите во вся веки.

Богородичен: От ребра Адамова Создавый Тя от Твоего девства воплотися, Иже всех Господь, Егоже поюще, вопием: вся дела, благословите, пойте Господа и превозносите во вся веки.

Катавасия: Сей нареченный:

Песнь 9

Ирмос: Безначальна Родителя Сын, Бог и Господь, * воплощся от Девы, нам явися * омраченная просветити, собрати расточенная. * Тем Всепетую Богородицу величаем.

Непрестанно Господа моли о нас, поющих тя, блаженне, яко Христова мученика, яко победивша мучителя, яко лукавых духов отгонителя, яко хранителя неусыпна, яко заступника непостыдна.

Страданий воздаяния богато тебе дарова всех Владыка, Емуже предстоя со дерзновением, преблаженне, мученическим и с веселием, призывающия тя, объемь, сохрани.

Земля тя сокры, и Небо прият, и отверзеса тебе дверь райская яве, в немже радостно, страстотерпче, ликуя и играя, верно поющия тя твоими молитвами соблюди.

Богородичен: Тя свидения сень прообрази, Пречистая, в нейже скрижали, и стамна, и золотый кивот: якоже бо оная, тако и Ты Безначальное Слово во утробе вместила еси, Богородице, воплощаемо.

Ин

Ирмос: От земнородных рождшися * и Творца рождшая, * наша похвало, Богородице Чистая, * Тя, яко владычествующую тварьми, величаем.

Священнии воспевают, царие восхваляют, и людие твоих страданий хвалу возвещают, мучениче Георгие. Темже тя вси ублажаем.

Воспеша вся Небесныя силы подвиги твоя, ты бо, пожерся, Богу благоугодил еси, мучениче Георгие. Темже тя вси ублажаем.

Богородичен: От земнородных возрастши и Зиждителя рождши, радуйся, наша похвало, Богородице Чистая, Тя, яко обладающую тварьми, величаем.

Катавасия: Светися, светися:

Светилен.

Подобен: Учеником зрящим:

Весна нам возсия, светлое Владычнее и Божественное Воскресение, * к Небесней пасце от земли нас пресылая, * с неюже просиявает всеславнаго мученика Георгия память светозарная, * юже светло совершим, * да Божественныя сподобимся благодати от Христа Спаса.

Слава:

Подобен: Свете неизменный:

Яко солнце светоносное, * чудесными зарями просвещаеши всю тварь, Георгие страстотерпче. * Темже, твою совершающе память, * поем Воскресшаго из гроба.

И ныне, праздника.

На хвалитех стихиры на 4, глас 2.

Подобен: Егда от Древа:

Приидите, всепразднственное, светлое, * славное Воскресение, вси торжествовавшии, * паки празднуем светло торжество Георгия мученика * и венчаем сего весненными цветы, * суща непобедима; * яко да того мольбами приимем * скорбей купно и прегрешений избавление.

Всего принесл еси себе, * тебе Давшему, всеблаженне, жизнь всецелую, * яко всеплодие живо и одушевленно * и жертву благоприятну и пречисту. * Темже был еси молитвенник теплейший, * бури изымая вся, * верою поющия тя, мучениче, * и призывающия тя, Георгие.

Семя возделав прилежно, * всеянное Слова в чистой твоей души, * сие умножил еси болезнями страдания * и, премудре положен в Небесных житницах, * нетленное обрел еси наслаждение. * Егоже ныне насыщая, блаженне, * твоими к Богу молитвами, * верою поюция тя спасай.

Мучениче страстоносче Христов, * сущия в напастех нуждных спаси, * мольбами твоими от всякаго обстояния избавляя * и отгоня душегубную лютую печаль, * благодати же и милости нам проси, * яко да молитвами твоими спасшеся, * радующеся, почитаем вси * честныя подвиги твоя, Георгие.

Слава, глас 2:

Да помавают праведная, рече Соломон, * человеком вежди: * помилуется бо от Христа Бога * видяй правая, предглаголаше. * Удобь же сия внушив, * о многотерпеливе Георгие, * Владычним учением последовал еси * и, беззаконным отдав себе, претерпел еси, * прелести требы оплевал еси, яко мерзски: * тело бо твое дав за любовь Создателя, * все на уды ссепси. * И велиар паче весь, постыдевся, уязвляшеся, * венценосца тя зря совершенна. * Темже во дворех живый Господа твоего с Вышними силами, * моли, страсотерпче Христов, * спастися душам нашим.

И ныне, праздника.

Славословие великое.

По трисвятом тропарь святого. Слава, и ныне, праздника.

Ектении и отпуст.

И дается святой елей братии от кандила святого, и час 1-й.

На 1-м часе тропарь праздника. Слава, святого, И ныне, Богородичен часов. По трисвятом кондаки праздника и святого, глаголем, пременяюще.

Стихиры на помазании, глас 2.

Подобен: Егда от Древа:

Вся, яже в житии, презрев, * точною одинаго Владыки любви душу привел еси, * великий Георгие, светильниче всемирный, * и к безмерным мукам отлучился еси мужески, * победы красен венец приял еси. * Темже молим тя, блаженне, * моли от бед всем избавитися, поющим тя.

Скорби и лютыя печали, * жития треволнения и бури ныне мя обуревают, * возмущением злых страстей одержим есмь. * Заступниче мой великий, блаженне Георгие, * представ, помози ми присно покровом твоим, * верою прибегающему ти, * яко да радостию сердца, мучениче, * ублажаю тя, спасаемь.

Слава, глас 4:

Приидите, верных собори, * приидите, праздник составим, * ибо пресветлая память днесь явися страсотерпца Георгия * наша просвещает невидимо сердца, * добродетельми блистаючи. * Темже, единомудренно воспевающе, рцем: * радуйся, воине великаго Царя Христа; * радуйся, пресветлая похвало веры; * радуйся, всесветле и пребогате. * О нас, преблаженне, всех Владыку, Христа Бога моли, * сохраненным быти от искушений лукаваго * и спасти души наша.

И ныне, праздника.

НА ЛИТУРГИИ

Блаженны праздника, песнь рядовая и от канона святого, песнь 3-я.

Прокимен праздника и святого, глас 7: Возвеселится праведник о Господе * и уповает на Него.

Стих: Услыши, Боже, глас мой, внегда молити ми ся к Тебе.

Апостол дне и святого, Деяния, зачало 29.

Во дни оны, возложи Ирод царь руже озлобити некия иже от церкви, уби же Иакова, брата Иоаннова, мечем. И виде, яко годе есть Иудеем, приложи яти и Петра, бяху же дние опресночнии. Егоже и емь всади в темницу, предав четверем четверицам воинов стрещи его, хотя по Пасце извести его к людем. И убо Петра стражаху в темнице: молитва же бе прилежна бываемая от церкви к Богу о нем. Егда же хотяше его извести Ирод, в ноци той бе Петр спя между двема воинома, связан железнома ужема двема, стражие же пред дверьми стражаху темницы. И се, Ангел Господень предста, и свет возсия в храмине: толкнув же в ребра Петра, воздвиже его, глаголя: востани вскоре. И спадоша ему узя железная с руку. Рече же Ангел к нему: препояшися и вступи в плесницы твоя. Сотвори же тако. И глагола ему: облецыся в ризу твою и последствуй ми. И изшед вслед его идяше и не ведаше, яко истина есть бывшее от Ангела, мняше же видение зрети. Прощедша же первую стражу и вторую, приидоста ко вратом железным, вводящим во град, яже о себе отверзошася има, и изшедша преидоста стогну едину, и абие отступи Ангел от него. И Петр быв в себе, рече: ныне вем воистинну, яко посла Бог Ангела Своего и изят мя из руки Иродовы и от всего чаяния людей Иудейских.

Аллилуия дне и святого, глас 4: Праведник, яко финикс, процветет:

Стих: Насаждени в дому Господни, * во дворех Бога нашего процветут.

Евангелие дне и святого, от Иоанна, зачало 52.

Рече Господь Своим учеником: сия заповедаю вам, да любите друг друга. Аще мир вас ненавидит, ведите, яко Мене прежде вас возненавиде. Аще от мира бысте были, мир убо свое любил бы, якоже от мира несте, но Аз избрах вы от мира, сего ради ненавидит вас мир. Поминайте слово, еже Аз рех вам: несть раб болий господя своего. Аще Мене изгнаша, и вас изженут, аще слово Мое соблюдоша, и ваше соблюдут. Но сия вся творят вам за имя Мое, яко не ведят Пославшаго Мя. Аще не бых пришел и глаголах им, греха не быша имели, ныне же вины не имут о гресе своем. Ненавидяй Мене, и Отца Моего ненавидит. Аще дел не бых сотворил в них, ихже ин никтоже сотвори, греха не быша имели, ныне же и видеша, и возненавидеша Мене и Отца Моего. Но да сбудется слово, писанное в законе их, яко возненавидеша Мя туне. Егда же приидет Утешитель, Егоже Аз послю вам от Отца, Дух истины, Иже от Отца исходит, Той свидетельствует о Мне. И вы же свидетельствуете, яко искони со Мною есте. Сия глаголах вам, да не соблазнитесь. От сонмищ изженут вы, но приидет час, да всяк, иже убьет вы, мнится службу приносити Богу.

Причастен праздника и святого: В память вечную будет праведник:

На трапезе утешение братии.

На молебне припев:

Спаси от бед рабы твоя, страстотерпце Георгие, * яко вси тя к Богу предстателя имамы, * яко непобедимаго Христова воина и тепла к Нему молитвенника.

Указ о великом мученице Георгии

Начинается от дне Великаго Пятка и восходит до четвертка 5-я недели по Пасце. И аще случится великомученика Георгия в Великий Пяток, или в Великую Субботу, или на самую Пасху, поются стихиры святого, и канон, и прочая служба в понедельник Светлая недели с службою дневною.

* * *

Аще ли случится великомученика Георгия во един от дней Светлая недели:

Вечер, на Господи, возвах: стихиры воскресны 3. И святого 3. Слава, святого, глас 6: Достойно имени: И ныне, Богородичен 1-й, гласа. Вход. Свете тихий: Прокимен дне. И чтения 3, святого. Аще в самую неделю Пасхи вечера, глаголет иерей: И о сподобитися нам: и прочая. И Евангелие читается по чину. На стиховне стихира воскресна. Таже стихиры Пасхи с припевы их. Слава, святого, глас 4: Разумнаго адаманта: И ныне, Пасхи, глас 5: Воскресения день: Христос воскрес: трижды. Слава, тропарь святого. И ныне, Богородичен 1-й, гласа. Иерей: Премудрость. И отпуст.

На утрени по Христос воскрес: и по 4-х стисех, Слава, тропарь святого. И ныне Богородичен 1-й, гласа. Таже обычная ектения и полиелей. Таже, седален святого, дважды. Слава, и ныне, Богородичен, и чтение. Таже степенна, 1-й антифон 4-го гласа. Прокимен: Всякое дыхание: Евангелие святого. Воскресение Христово: трижды. Слава, Молитвами страстотерпца: И ныне, Молитвами Богородицы: Таже припев: Возвеселится праведник о Господе * и уповает на Него. И поем стихиру святого самогласну, глас 6: Днесь вселенная вся: Таже иерей глаголет: Спаси, Боже, люди Твоя: И мы, Господи, помилуй, 12. По возгласе канон Пасхи со ирмосом на 8. И святого, на 6. Катавасия Пасхи, оба лика вкупе. По 3-й песни кондак и икос Пасхи, и чтение. По 6-й песни кондак и икос святого, и чтение. Воскрес Иисус: трижды, поем на оба лика. По 9-й песни светилен Пасхи. Слава, святого. И ныне, Пасхи. На хвалитех стихиры воскресны 3 и святого 3. Таже стихиры Пасхи с припевы их. Слава, святого. И ныне, Пасхи: Воскресения день: Христос воскрес: трижды. Слава, тропарь святого. И ныне, Богородичен 1-й. Ектении, и отпуст. Часы же поются Пасхи, по обычаю.

На Литургии: антифоны Пасхи. По входе Христос воскрес: трижды. Таже тропарь святого. Слава, кондак его. И ныне, Пасхи. Вместо же трисвятого поем: Елицы во Христа: Прокимен, Апостол, аллилуия, и Евангелие, и причастен прежде дне и святого.

* * *

О памяти святого Георгия, аще случится в неделю Фомину:

В субботу светлая недели на малой вечерни на Господи, возвах: стихиры праздника на 4. Слава, святого. И ныне, праздника. На стиховне стихиры святого с припевы его великия вечерни. Слава, святого. И ныне, праздника. Тропарь святого. Слава, и ныне, праздника. Ектения малая и отпуст.

На велицей вечерни по обычной кафизме на Господи, возвах: стихиры праздника на 6 и святого на 4. Слава, святого. И ныне, праздника. Вход. И чтение святого. На литии стихиры праздника и святого. Слава, святого. И ныне, праздника. На стиховне праздника. Слава, святого. И ныне, праздника. На благословении хлебов тропарь праздника дважды. И святого единожды. И чтение в Деяниях Апостольских.

На утрени на Бог Господь: тропарь праздника дважды. Слава, святого. И ныне, праздника. По кафизмах седалны праздника. И чтение. Полиелей, и седален, и чтение праздника. Степенна, 1-й антифон 4-го гласа. Прокимен: Всякое дыхание: Евангелие праздника, от Матфея, зачало 116: Едининадесять ученицы: Воскресение Христово: трижды. Псалом 50. Слава, Молитвами апостолов; И ныне, Молитвами Богородицы: Стихира, Воскрес Иисус: Канон праздника, со ирмосом на 8, и святого на 6. Катавасия Пасхи: Воскресения день: оба лика вкупе. По 3-й песни кондак святого, и икос, и седален, дважды. Слава, и ныне, праздника. И чтение в Богослове, егоже начало: Обновлением чтитися: По 6-й песни кондак праздника, и икос, и чтение. По 9-й песни, поем: Свят Господь Бог наш: на глас 1-й. Светилен праздника. Слава, святого. И ныне, праздника. На хвалитех стихиры праздника 3 и святого 3. Поем же и самогласен святого: Да помавают праведная: с припевом его: Возвеселится праведник о Господе: Слава, праздника. И ныне, Препоблагословенна еси, Богородице: Славословие великое. По трисвятом тропарь святого. Слава, и ныне, праздника, ектении, и отпуст, и оглашение Студитово, и обычное исхождение. Слава, и ныне, стихира евангельская. И час 1-й в притворе.

На часех тропарь праздника. Слава, святого: И ныне, Богородичен часов. По Отче наш: кондаки, пременяюще, глаголем.

На Литургии: Блаженны праздника, песнь 3-я на 4 и святого песнь 6-я на 4. По входе тропарь праздника и святого. Слава, кондак святого. И ныне, праздника. Прокимен, Апостол, аллилуия, Евангелие и причастен, прежде праздника, таже святого.

* * *

Аще случится память святого великомученика Георгия в неделю Мироносиц, или Разслабленного, или Самаряныни:

В субботу на малой вечерни на Господи, возвах: стихиры воскресны 4. Слава, святого. И ныне, Богородичен. На стиховне стихира воскресна и святого стиховна великия вечерни с припевы его. Слава, святого. И ныне, Богородичен. Тропарь воскресен. Слава, святого. И ныне, Богородичен. Ектения малая и отпуст.

На велицей вечерни по обычной кафизме, на Господи, возвах: стихиры воскресны гласа 3, и праздника 3, и святого 4. Слава, праздника, самогласен Троици. И ныне, Богородичен 1-й, гласа. Вход. Прокимен дне и чтения святого 3. На литии стихира храма и святого самогласны. Слава, святого. И ныне, праздника. На стиховне стихира воскресна и Пасхи. Слава, святого. И ныне, Троици. На благословении хлебов тропарь Богородице Дево: дважды и святого единожды, и чтение в Деяниях Апостольских.

Аще есть неделя Мироносиц: На Бог Господь: тропарь воскресен: Егда снизшел еси к смерти: единожды. Благообразный Иосиф: единожды. Слава, Георгия. И ныне: Мироносицам женам:

Аще ли во ины недели: Тропарь воскресен дважды, Слава, святого. И ныне, Богородичен 1-й гласа в тойже глас. По кафизмах седальны воскресны и Богородичны их. И чтение во Евангелии толковом. Полиелей и седальны оба святого. Слава, седален по полиелей. И ныне, Богородичен и чтение святого. Степенна, и прокимен гласа. Всякое дыхание: Евангелие воскресно. Воскресение Христово: трижды. Псалом 50. Стихира воскресна. Канон Пасхи со ирмосом и с Богородичны их на 6, и святого на 4, и Троида на 4. Поем же сице: на коейже песни тропарь воскресен един, и праздника един, и Троичен, и Богородичен. Катавасия: Воскресения день: По 3-й песни кондак святого, и икос, и седален его, дважды. Слава, и ныне, праздника, и чтение святого. По 6-й песни кондак праздника и икос. На 9-й песни Честнейшую: не поем. Светилен Пасхи. Слава, святого. И ныне, праздника. На хвалитех стихиры воскресны 4 и святого 4, со Славным и с припевы его. Слава, праздника. И ныне, Препоблагословенна еси: Славословие великое. По трисвятом тропарь воскресен, ектении, и оглашение, и отпуст, и обычное исхождение в притвор. Слава, и ныне, стихиры евангельская, и час 1-й.

На часех тропарь воскресен. Слава, святого. И ныне, Богородичен часов. По Отче наш: кондаки, прменяюще, глаголем.

На Литургии: Блаженны гласа на 4 и Троида песнь 3-я на 4 и святого песнь 6-я на 4. По входе тропарь воскресен и святого. Слава, кондак святого. И ныне, праздника. Прокимен, Апостол, аллилуия, и Евангелие, и причастен прежде дне, таже святого.

* * *

Аще случится святого великомученика Георгия в среду Преполовения Пятидесятницы:

Во вторник вечера поем Блажен муж: первый антифон. На Господи, возвах: стихиры праздника 3 и святого 3. Слава, святого. И ныне, праздника. Вход. Прокимен дне, и чтения праздника 3, и святого 3. На стиховне стихиры праздника, с припевы их. Слава, святого. И ныне, праздника. По трисвятом тропарь святого. Слава, и ныне, праздника, и отпуст.

На утрени на Бог Господь: тропарь праздника дважды. Слава, святого. И ныне, праздника. По кафизмах седальны и чтение праздника. Полиелей и седальны вси святого, и чтение. Степенна, 1-й антифон 4-го гласа. Прокимен. Всякое дыхание: Евангелие святого. Воскресение Христово: единожды. Псалом 50. Стихиры святого. Канон праздника первый 4-го гласа со ирмосом на 6, и святого на 4, и праздника другий канон, глас 8, на 4. Катавасия, ирмос последняго канона праздника оба лика вкупе. По 3-й песни кондак святого, и икос, и седален его, дважды. Слава, и ныне, праздника. По 6-й песни кондак праздника и икос. На 9-й песни Честнейшую: не поем. Светилен праздника. Слава, святого. И ныне, праздника. На хвалитех стихиры праздника 3 и святого 3. Слава, святого. И ныне, праздника. Славословие великое. По трисвятом тропарь святого. Слава, и ныне, праздника, таже ектений, и отпуст, и час 1-й.

На часех тропарь праздника. Слава, святого. И ныне, Богородичен часов. По Отче наш, кондак праздника, и святого, прменяюще, глаголем.

На Литургии: Блаженны праздника, 4-го гласа, песнь 3-я на 4 и святого песнь 6-я на 4. По входе тропарь праздника и святого. Слава, кондак святого. И ныне, праздника. Прокимен, Апостол, аллилуия, Евангелие и причастен прежде праздника и святого.

* * *

Аще ли случится великомученика Георгия в Неделю Самаряныни:

Оставляется служба Преполовления Пятидесятницы, и поется воскресна, и самаряныни, и святого Георгия.

Молитва 1-я

Святый, славный и всехвальный великомучениче Георгие! Собраннии в храме твоём и пред иконою твоею святою покланяющися людие, молим тя, известный желания нашего ходатаю, моли с нами и о нас умоляемого от Своего благоутробия Бога, да милостивно услышит нас, просящих Его благостыню, и не оставит вся наша ко спасению и житию нужная прошения, и дарует стране нашей победу на сопротивных; и паки, припадающе, молим тя, святыи победоносче: укрепи данною тебе благодатию во бранех православное воинство, разруши силы востающих врагов, да постыдятся и посрамятся, и дерзость их да сокрушится, и да уведят, яко мы имеем Божественную помощь, и всем, в скорби и обстоянии сущим, многомогущее яви свое заступление. Умоли Господа Бога, всея твари Создателя, избавити нас от вечнаго мучения, да прославляем Отца, и Сына, и Святаго Духа и твое исповедуем предстательство ныне, и присно, и во веки веков. Аминь.

Молитва 2-я

О всехвальный, святыи великомучениче и чудотворче Георгие! Призри на ны скорою твоею помощию и умоли Человеколюбца Бога, да не осудит нас, грешных, по беззакониям нашим, но да сотворит с нами по велицей Своей милости. Не презри моления нашего, но испроси нам у Христа Бога нашего тихое и богоугодное житие, здравие же душевное и телесное, земли плодородие и во всем изобилие, и да не во зло обратим даруемая нам тобою от Всецедраго Бога, но во славу святаго Имени Его и в прославление крепкаго твоего заступления, да подаст Он стране нашей и всему боголюбивому воинству на супостаты одоление и да укрепит непремняемым миром и благословением. Изряднее же да оградит нас святых Ангел Своих ополчением, во еже избавитися нам по исходе нашем из жития сего от козней лукаваго и тяжких воздушных мытарств его и неосужденным предстати Престолу Господа славы. Услыши нас, страстотерпче Христов Георгие, и моли за ны непрестанно Триипостаснаго Владыку всех Бога, да благодатию Его и человеколюбием, твоею же помощию и заступлением обрящем милость со Ангелы и Архангелы и всеми святыми одесную Правосуднаго Судии стати и Того выну славити со Отцем и Святым Духом ныне, и присно, и во веки веков. Аминь.